

重修兩淮鹽法志

兩淮鹽法志卷一百五十一

雜紀門

書院

義塾附

古者黨有庠州有序所以培養人才者法至善也況淮揚爲人文淵藪承平以後漸臻富庶則教養宜先是以鹽政亟亟振興文教修講舍延院長課生徒澤之以詩書文之以禮樂然後瘡痍一洗民氣復新傳曰崇鄉里之化以厲賢材管子曰海王之國謹正鹽筴衣食足而後知榮辱故善爲政者宜於此加意焉志書院

安定書院舊在府治東北三元坊康熙元年巡鹽御史

胡文學建祀宋儒胡瑗雍正十一年

詔各省設立書院巡鹽御史高斌運使尹會一以廣陵名郡人文淵藪亟宜振興議卽舊址重建諭商公捐凡工費白金七千四百有奇經始十三年春二月冬十月落成仍名安定書院其生徒員額初以六十人爲率後增至五百人乾隆二年運使徐大枚詳定額選四十人至六年運使朱續暉復增二十人並合梅花書院生徒附院講課其百二十人其掌教脩脯諸生膏火優獎及其役食並歲修銀數屢經增捐四十三年仍分設梅花書院五十九年運使曾燠增修學舍重定規條正附課各七十

二人隨課無定額月二課正課月給膏火三兩附課一兩住院肄業者於常額外日增膏火三分每課一等至二等之首書其殿最歲登下之其尤者仿古上舍之例增正課膏火一兩五錢無定額嘉慶五年爲復公車資費院士有舉於鄉者具旗扁以榮之八年重修堂廡庖湑之屬每歲科兩試及秋闈亦各資之路費自此來學者四遠麇至咸豐間經寇亂院宇全燬同治四年鹽政李鴻章飭運司李宗義籌款重建以安定書院舊趾費鉅驟難修復五年運司丁日昌蒞任先借廣陵書院給卷場課山長暫居別舍七年始建於東關街疏理道巷

口官房書院同課生監今則童生亦得與課十二年增
定生監正課四十名附課四十名隨課無定額童生上
取十五名中取二十名次取無定額每年二月甄別後
每月初二日官課十六日館課按月升降開課後仍令
投考三次每月另設小課隨卷之多寡錄取亦無定額
掌教錢振倫移建安定書院記曰揚州安定書院舊在
府東北三元坊隣使高公有記後吳穀人祭酒復爲增
都轉校士記原名雖燬而其文錄於郡乘可覆視也自
巡鹽使者改併兩江制府而書院課程始由都轉主之
咸豐間揚城迭次失陷及收復而故迹不可復問同治

五年都轉丁公議復安定梅花兩書院權建於東關六街民舍安定亦同時開課而尙未得地越二年得宅於左衛街梅菴之名屬焉而東關之宅遂建爲安定書院初延吳介臣侍御主講已閱六年及振倫繼至而碑誌闕然是歲可以弗記與考胡翼之先生教授蘇湖當時大學至爲取法今吾湖胡氏宗祠卽名安定書院此外書院之以安定名者所在多有特揚爲人文淵藪胡公所居近在海陵固宜其名之尤著耳抑振倫竊有進者胡公之教分經義治事爲兩齋殆期於通經致用亦各因其才質而造之

國初定制

頒卧碑於膠庠軍民一切利弊不許生員一言建白誠見夫人心不古今昔異宜故於嚴防橫議之中寓保全士類之意此非淺儒之所識也自粵匪肆擾東南浮競之士相率投匭獻書以希躋等之榮進或且樂其誕而崇獎之事後追思百無一驗然則所謂留心經濟者其效亦略可睹矣書院舊有

憲廟賜額曰經術造士而不及治事蓋與卧碑之旨若符節焉今江淮蕩定士之返其鄉者類能誦習其鄉先生之業而不專爲徼倖速化之文卽以振倫之迂拙猶得棄短

朝建樹則視其所自爲斯無容過爲高論以預期抑豈得以專重經義疑爲偏而不舉耶維時都轉使者爲同年定遠方公名濬頤甲辰進士監院事者揚州府屬教授施君震福訓導吳君琪生徒二百餘人同治十有一年七月記

雜記
卷完

因公上郡治事之所曰會館統名之曰偕樂園萬厯三十三年太監魯保重修後經檄毀惟存其堂與樓供諸生講業名崇雅書院久圯

國朝雍正十二年揚州府同知劉重選與紳商馬曰琯謀卽其址爲講學地曰琯獨力興建更名梅花書院江都教諭吳銳爲記乾隆四年巡鹽御史三保以運使徐大枚請重定諸生膏火亦於運庫公支項下動給八年併附安定書院四十二年曰琯子振伯呈請歸公運使朱孝純以廣陵爲人文之藪書院舊址未便任其傾圯諭商捐修並定每年經費更新其制六十年運使曾燠重

立規條正附各五十人隨課無定額其諸經費略視安定而損益之咸豐閒寇亂書院全燬士子星散已十餘年同治四年江南肅清鹽政曾國藩亟亟培養人材飭運司李宗義設法籌款整理書院以揚營賞號一款向由鹽務按引捐銀四分八釐每月可得銀一千餘兩當此揚防凱撤卽將此款賞號銀兩自三月起留爲整理書院之用五年建於東關街疏理道巷口官房七年移建於左衛街入官民房原地改爲安定書院開課原委生童額數並與安定書院同

孝廉堂會課本附梅花書院今仍附入同治十二年增

定正課十五名附課十五名隨課無定額因未延山長
每月無館課小課仍隨生監併考每遇會試停課五月
預給膏火考課之法亦如生監例

廣陵書院初名義學在府治西康熙五十一年知府趙
宏煜建雍正十三年知府高士鑰改名課士堂延邑之
有文望者衡藝其中乾隆閒改名竹西書院知府恆豫
馬慧裕先後創建移於東關街更今名專課童生嘉慶
十四年鹽政阿克當阿廣額數增膏火親臨課士赴試
者雲集同治四年運使李宗義據揚州府詳經費不敷
批准自明年起每年於安定梅花兩書院款內撥給膏

火銀五百七十六兩掌教朱方增廣陵書院增額記曰
嘉慶十三年長白阿厚菴直指奉

天子命巡視兩淮惠澤滂流商氓咸被而又宏獎士類扶輪大
雅爲一代師表下車後卽添設安定梅花樂儀三書院
膏火資旣又念廣陵爲童子肄業之地人才發軔實基
於此舊時設額過隘且歲入數百金不足以贍多士遂
於四十年秋廣課額益膏火加脩脯以爲學者勸嘗親
臨課士赴試者至數百人蓋鼓舞之效於斯可睹也先
是各生徒未有孝廉與其間者直指泣兩淮始令入梅
花書院肄業雖異籍人皆得至焉於是大江南北聞風

廬集絃誦鼓歌盛於往歲明年洪君瑩遂掄大魁今廣
陵諸士子復邀直指培植之厚月磨歲瑩向往而不已
將見文學駸駸日上翔金門步玉堂繼洪君而起者又
可勝旣哉余忝來主講席竊慕直指重文愛士之意旣
爲諸士子慶而尤望後之官斯土者踵而行之不至廢
墜則千百年後猶將沐浴膏澤也故爲之記其顛末並
將新增規則附列於後以垂諸久遠

謹按嘉慶揚州府志載敬亭書院在北橋康熙二十
二年兩淮漕政裘充美公建今廢

樂儀書院在儀徵縣治天甯橋坊乾隆三十二年勅自

縣令三原衛崑駿規曾驍騎宅舊址爲之鹽政普福淮南監掣同知蘇爾通阿宋維琦權監掣事解韜皆捐貲以助落成學政曹秀先榜曰樂儀並記其事山東按察使仁和沈廷芳時爲院長有講堂記並勒石五十二年歸併鹽務六十年運使曾燠添設正課生童八名附課生童八名共正附課生童七十六名其前列者加給優獎四方來試者與安梅同並刊三書院課藝以程多士嘉慶七年重葺歲費不敷運使曾燠捐俸助焉咸豐三年粵匪陷城書院遭燬同治五年鹽政曾國藩飭運司程桓生查明書院每年需用若干卽於揚營賞號改作

書院經費項下酌量分撥六年五月開課暫借太平菴給卷十二年增定生監正課二十五名附課二十名隨課無定額考課之法亦與安梅兩書院同光緒元年卽舊址重建

鍾山尊經兩書院在江甯省城內同治四年鹽政曾國藩以兵燹後亟宜振興文教籌款興復光緒五年鹽政沈葆楨增給書院士子膏火飭海分司於經收淮北經費並徐屬稅課項下自正月起按季提撥銀五百兩批解江甯府衙門兌收專款存儲以備支給膏火之用十一年海分司稟兩書院膏火奉撥徐臺軍需因本款無

可撥解請示鹽政曾國荃批查該分司衙門徵收淮北書院正雜項下實存銀一萬一千餘兩係外銷之款仰卽在前項內如數借支至今照常撥解

奎文書院在淮安府城西北隅光緒七年運使洪汝奎詳籌議書院經費暫在淮北商捐工賑餘款內提銀五千兩發商每月一分生息按季解交淮安府支用經鹽政劉坤一批允

謹按一分息銀每年解淮安六百兩計約不敷銀百兩係在板浦敦善書院公款內湊解嗣以商捐工賑支銷挑河工費復在經費項下撥墊銀五千兩發商

生息按月解淮安府

敦善書院在海州板浦鎮乾隆十年建初名天池書院
嘉慶二年移建中正場改名郁洲書院六年復移建板
浦鎮北街因陶淵明昔嘗過此取陶詩匪道曷依匪善
奚敦之句易今名後經臨興場大使借住而書院遂廢
歷三十年每年領書院經費銀三百六十兩始猶院長
傳題繼則空文膏火至道光十四年始專延院長聚諸
生童於分司署內按月兩課十八年運判童濂以官衙
究非會課之所亟思興復因擇地於鎮東崇慶禪院左
首就小港填平興造又公捐粟鹽一千引所得贏餘利

息作爲書院經費同治二年鹽政曾國藩允分司請每引捐銀二釐六毫以資津貼

衛公書院在大伊山鎮乾隆九年海州知州衛哲治勸建兵燹後捐助無多經費不敷光緒十五年海州分司徐紹垣勸諭票販每鹽一包捐錢一毫又由大伊山卡員憚洪年助錢六十千共成二百千十七年以院中僅課童生推廣兼課生員飭販加捐一毫是年得錢三百三十餘千以助膏火

文正書院在石港場舊名至聖書院後改忠孝書院最後易今名康熙開通州分司楊鶴年修因無經費興廢

廩常乾隆五十八年鹽政董椿以運使曾燠請允九場商眾捐資供師生脩脯膏火以爲九場生童肄業之所同治間分司沈炳捐資重修今分司項晉蕃按月課試率九場各員集資以給膏火

沙南書院在柑茶場先是明大使周鑛設社學於五賢祠乾隆十年大使姚德璘改設於場署西范公祠舊址遂有今名五十九年大使沈鈞重修光緒間由大使趙慶濂課試生童集資以給膏火

正心書院在草堰場本義學舊置學田二百餘畝乾隆二十一年大使郝月桂改爲書院以沙漲地二十餘畝

歲租百金贍膏火嘉慶間撥學田租入供書院中祀文昌之用

守正書院在角斜場光緒十七年大使唐如崗籌款勸立隨時課試

精進書院在餘西場光緒十七年大使唐如崗勸建以竈戶助資並田畝租息爲課試生童膏火山長脩脯之需

東漸書院在餘東場由通州署延山長課試生童同治間撥有餘東場公蕩租息並餘西場商每年協助爲脩脯膏火之資

崇文書院在伍祐場光緒十一年建

呂四場書院光緒年由鹽務助資以給膏火

湘水校經堂在湖南省城道光年間巡撫吳榮光在嶽麓南城書院外勅設軍興以後虛名僅存光緒七年湖南巡撫李明墀學政朱道然奏明興復咨會兩江鹽政左宗棠諭湘岸驤商量力輸助每年共捐銀四千兩遂於省城勅建一堂另延名師主講專以課經爲本李明墀疏曰查道光年間前湖南撫臣吳榮光在於嶽麓南城兩書院外勅設湘水校經堂籌集經費酌定章程爲教育英髦通經致用之意計其時多士景從咸知講求

實學人才輩出稱爲極盛迨軍興以後舊存經費半歸
軍需提用其發典生息者又因典商歇業追繳未完以
致積漸廢弛虛名僅存臣前年履任時至兩書院訪悉
情形卽思設法興復適前學臣朱迥然亦慨然以培才
厲學爲己任往復商榷非仿照揚州梅花書院之例勸
令淮商每歲捐助經費集事終屬無期因咨會兩江督
臣商請飭諭湖岸離商量力輸助旋准咨覆該商等深
明大義僉知有舉莫廢合共捐資計每年約共捐銀四
千兩遂議於省城勸建一堂另延名師主講專以課經
爲本兩年以來規模粗具所捐經費除支給館師束脩

諸生膏火及修理講舍採辦書籍之外每年尙可稍有
贏餘已飭經營之員另款提存生息一俟將來存項充
裕卽可遞年減捐以紓商力而校經堂亦不致因經費
不繼復就廢弛庶以仰副我

皇上敦崇實學之至意

嶽麓南城求忠三書院在湖南省城光緒十一年鹽政
曾國荃飭督銷局在所收商捐經費內每歲撥支銀三
百六十兩分送三書院作爲佐齋生童忠齋月課加獎
思賢講舍在湖南省城曾文正公祠西同治十一年建
湘岸商人每票捐銀二十四兩作爲經費

義塾附

揚州城內義學舊有三處一設董子祠一設蕃釐觀一設司解久廢嗣於都天廟西來菴二郎廟並五門先後設立義學嘉慶四年商人洪箴遠等以揚城寬廣止此數學不足以容誦習請捐資於十二門各設義學一所盡裁舊設義學運使曾煥請於鹽政徵瑞允行之咸豐三年粵匪之亂並已無存同治五年城內先設四塾西北隅設於

武廟西南隅設於

文昌宮東北隅設於古道院東南隅設於三元宮八年又

增二塾一設新城財神廟一設舊城城隍廟皆離務籌資

揚州營義學乾隆二十八年游擊白雲上請於鹽政李質穎設立經亂已廢同治間新設在馬神廟

鹽捕營義學新設在馬市口

揚州城外義學同治年新設西北設於陳家集劉家集公道橋黃珏橋槐子橋共五塾東南設於邵伯鎮樸樹灣施家橋永安鎮宜陵鎮仙女鎮共六塾亦離務助資謹按揚州義學時或遷移光緒十七年淮南總局開呈義學月支經費劉猛將軍廣三元宮古道院董子

祠邵伯鎮共五塾月支錢各十三千一百文揚州營
鹽捕營務本堂共三塾月支錢各八千文缺口街萬
壽寺仙女鎮共三塾月支錢各十千文按劉猛將軍
廟董子祠務本堂缺口街萬壽寺塾又新移設也

通州分司所屬

豐利場社學舊舍無考乾隆三十年設塾於

文昌宮東側今存以民竈各戶捐施田畝助延師訓課之

資

舊志社田四
十三畝今存

掘港場社學一所久圯

舊志社田五
十畝今存

掘港場義學一所乾隆十二年徽商程公能吳振公等

公建

石港場社學一所見無生童肄業

石港場義學一所今由分司延師訓課

舊志社田四十畝今存

馬塘併場社學一所久圯

舊志社田四十畝今存

謹按舊志載石港義學二所嘉慶五年通州運判秦永清捐建今廢其一

金沙場社學一所創自前明宏治十三年久圯

國朝雍正十三年大使王馨重建改爲義學光緒年間附設霞山書社課試生童大使陳皓率董集資以給膏火

舊志社田三十畝今存

西亭併場義學一所今存

舊志社田三十二畝今存

呂四場社學一所久廢

舊志社田無

餘西場社學一所乾隆四年大使王嘉俊重建

舊志社田三十

二畝今存

餘中場自歸併餘西後改場署為社學一所

舊志社田五十六畝

又六十畝今存

餘東場社學一所久圯今有義學二所光緒年間撥充

公田蕩租息以資修脯

舊志社田二十八畝今存

角斜場社學一所舊舍久圯乾隆十年大使金陟延師於上真殿督課五十四年大使王寶階諭商竈捐置房

屋復興社學歲久傾頽光緒間大使閔廷楷捐修

舊志社田

五十畝嘉慶九年商人汪瑤圖總龍湯潁川捐助田六十二畝嗣又增捐三十二畝見共存一百四十五畝

耕茶場社學一所歲久將圯乾隆元年大使李慶生重

葺十年大使姚德璘移建場署之西光緒十七年大使

趙慶濂捐廉倡首延師於署東范公祠訓課

舊志社田四十七畝

存今

泰州分司所屬

富安場社學一所明宏治二年吳大成捐地興建萬厯

十七年分司周汝登重修

國朝乾隆元年署大使曹夢華就舊基重建

舊志社田五十二畝今存

安豐場社學一所久圯

舊志社田三十畝今存同治七年附貢生虞書姚薰等查出六

十六畝共九十六畝旋由舉人陳寶杜效曾稟請改為

安豐鄉試卷燭等費同治七年彭立山捐助田三十二

畝八年周論福捐助田十畝九年職員周禮

門捐助荒田三十畝見共存一百六十八畝

梁垛場社學一所

舊志社田一百四十五畝今存

東臺場社學二所久圯光緒七年鹽務公捐添設培英

義塾商竈按桶捐錢一文以助經費

舊志社田一百五十五畝湮沒無存

何垛場社學一所光緒七年分司運判沈桂捐廉延師

訓課商竈按桶捐錢一文以助經費

舊志社田五十三畝七分又五十四

畝今存

丁谿場社學明宏治二年運判徐鵬舉創建六楹萬厯

十八年增建至十一楹門樓一座

國朝順治四年巡鹽御史張翮重建歲久已圯咸豐元年

場人士呈請於場東鹽課司社倉舊址復建

舊志社田九十七畝

續丈出九十二畝光緒十五年大使葉懷善將詳雲山廟產歸併義學計田二百五十八畝見共存四百四十畝

小海團社學一所乾隆三十一年場署遷小海團大使

蔡士毅假僧舍爲義學場裁署廢場人朱暉等捐買西

偏爲學舍四十年場大使唐澐詳撥公蕩資膏火年久

學廢嘉慶二十四年場人士經理定案撥蕩地一百四

十三頃有奇查別堪墾地七十二頃場商認租除按則

納課外清歸社學租價每年八十千文場人袁培經理
重建規模一新乃復延師課徒公呈立案又康之垣康
泰各捐塚田一坵場員亦捐廉益之舊志祖田二百畝
沙蕩三十六頃
二十畝今並存

南園社學一所道光十七年場人董用威捐宅建置並
業田二百餘畝盡捐爲膏火之資呈縣場立案久廢未
復

西園社學一所道光十四年董事呈請以本團境北觀
音殿改建社學經鹽政學政批允又場大使每年捐俸
錢六十千文並於商勸捐延師開館訓課嗣商人洪貽

蕙捐二十五總蕩地竈民常秦五捐二十總熟田又本
場歸公招陞淤地流金灘經場大使撥分兩股咸豐元
年又建講堂久廢未復

沈家竈義學一所道光十五年商竈捐建今存

劉莊場社學一所乾隆五年署大使陸廷燦吳仲先捐

修在青龍閣西今廢舊志社田二十
五畝湮沒無存

草堰場社學一所舊志社田一百
九十三畝今存

白駒場社學一所舊志社田一百三十畝田依串場河
邊租戶將河灘餘地挑鑿成田續經

文增四十六畝見共
存一百七十六畝

伍祐場社學一所舊志社田九十三畝又二
十六畝五分今皆存留

新興場社學二所

舊志社田八十畝久沒無存

廟灣場社學一所皆圯

舊志社田一百二十畝久荒

海州分司所屬

板浦場義塾三所咸豐間遭兵燹久廢房屋全圯同治八年分司許寶書捐資修葺大使沈維鎮添設一塾歲支經費由分司籌支六十兩再由場商於書院經費項下每引加捐四毫共計每引捐銀三釐計太平局每綱可捐銀六十餘兩共計銀一百二十餘兩以助膏火之需光緒十七年大使全錫祥添設中義塾援前案於書院經費項下加撥銀六十兩

舊志社田三百畝久荒

中正場東西義塾二所同治八年大使魏源創設在西

街觀音堂內開學為西義塾又於街東天齊廟內添設

一塾為東義塾以便無力延師者就近附讀兩義塾經

費每年各八十餘兩

舊志社田五畝久荒

臨興場義學一所光緒十三年運判項晉蕃設立每年

經費於敦善書院項下撥給銀六十兩以助膏火

舊志社田

久荒

沈陽縣義塾十五所光緒八年添設沈陽縣稟卑縣共

計二十七鎮見僅高流鎮陰平集馬廠集各設義學一

處城內暨東西兩關各設義學一處每處每年需費六

十千每年進款僅石頃湖充公地租錢二百八十千其短少之數皆係捐廉發給此外二十四鎮均無義塾請添撥經費鹽政左宗棠批飭運司在於司庫雜款內每月酌撥錢三十千文計一年撥錢三百六十千加以流陽湖地租錢三百千文可添設義塾十處爲之創始其餘由縣自行量力陸續籌辦

清河縣義塾七所同治九年設立由淮北商人捐助經費

西壩義塾同治九年添設就卡房東偏院一所建造學舍分司許寶書勸商每綱捐錢一百四十餘千作爲經

費

謹按場之有社學自前明宏治二年徐鵬舉爲泰州分司始每場置社學選場士有學者教之又自爲經訓一篇越十三年巡鹽御史史載德乃徧於諸場置學運使畢亨親定教條其後興廢靡定

國朝康熙十四年巡撫湯斌廣興社學由是諸場漸復其舊咸豐間揚州疊遭兵燹各場社學多廢其已興復者備注年月未修復者仍存其名俾後人有攷焉

附商籍舊案

明萬厯間定商籍籍由運使送考揚郡商籍額取十四

名竈籍額取六名共二十名附揚州府學

國朝順治十六年禮科雷一龍請裁各省衛學商學經撫按漕三院會題揚州商竈籍附入郡學亦無官俸廩糧與科議歸併府州縣之議相符部覆准行乾隆四十四年三月大學士阿桂等會議各省商籍查明人數多寡酌減入學名額編爲鹵字號取中復經江蘇巡撫楊魁查鄉試報考人數不敷另編字號奏請併入民籍取中禮部議奏

國家恤商恩例自當按人數多寡設額今江淮商籍生童扣除不合例者應考祇有一人是商之親子弟姪並無

讀書應考之人已可概見入學舊額應行裁汰其有情願改歸本籍者准其呈明改歸本省鄉試廩增照例改爲候廩候增與本籍考案新舊開補照原食餼年分出貢其實有田廬墳墓在江南與入籍之例相符者准其呈明於居住之州縣入籍竈籍原與各該州縣土著無異應歸於各該州縣民籍考試以後如果人文日盛不妨再請設額奉

旨允行

兩淮鹽法志卷一百五十一

兩淮鹽法志卷一百五十二

雜紀門

善舉

鹽義會 善堂 義渡 橋梁街道 義塾 救生

淮商盛時務奢靡然出有餘以濟不足亦未嘗不竭其
力信乎書言既富方穀也兵燹後淮海之間凶荒有備
水旱無虞使鰥寡孤獨廢疾皆有養至澤及枯骨不亦
仁厚之風歟况有司能務教化上宣

聖主之仁恩下振閭閻之饑溺百廢具舉惠政斯傳爰將同治
以來興復義倉善堂以類相從悉著於篇俾後人推廣
行焉志善舉

鹽義倉

揚州倉在府署東光緒七年運使洪汝奎就鹽漕察院舊址勅建儲穀一萬石陸續撥用現存穀五千二十七石五斗四升

揚州東關門葺釐觀後一倉雍正四年建額儲穀三萬石乾隆十一年增儲穀三萬石共六萬石咸豐閒燬於賊未修復

揚州廣儲門外三倉雍正四年建額儲穀各三萬石乾隆十一年增儲穀各三萬石共十八萬石咸豐閒經亂悉燬未建復

通州倉雍正五年建額儲穀二萬六千石乾隆十一年增儲穀八千四百石共三萬四千四百石現在通泰倉穀由商每引捐錢二十文光緒九年通屬存穀六千六百石詳雜捐

謹按光緒乙亥通州志倉在天甯寺左

如皋倉雍正五年建額儲穀一萬四千四百石

謹按光緒乙亥通州志倉在預備倉南

石港倉雍正十三年建額儲穀一萬石今由分司衙門經理現存穀六千八百六十五石

泰州倉雍正五年建額儲穀五萬石乾隆十一年增儲

穀四萬石共九萬石現在通泰倉穀由商每引捐錢二十文光緒九年泰屬存穀二千五百餘石詳雜捐

鹽城倉雍正五年建額儲穀五萬八千石乾隆十一年增儲穀四千石共六萬二千石今廢

東臺倉雍正十三年建額儲穀一萬石年久廢圯光緒三年修復倉廩十六間七年增建八間現儲穀二萬二千四百七十八石一斗九升

阜甯倉雍正十三年建額儲穀五千石兵燹後存倉屋三間現儲廟灣場積穀未修復

海州倉雍正五年建額儲穀一萬二千六百石

板浦倉雍正五年建額儲穀二萬一千六百石年久傾圯道光十七年分司童濂修建

謹按同治以來淮南採買穀石皆隨時籌款淮北則奏明倉穀每引捐銀一分詳見徵權門修建原始見雍正乾隆閒巡鹽御史奏疏及同治以來案牘詳後雍正三年十二月巡鹽御史噶爾泰奏據眾商以感戴皇仁鹽課裕情願捐銀二十四萬兩以充公用又備鹽臣公務銀八萬兩四年正月有

旨以二萬兩

賜噶爾泰以三十萬兩爲江南買儲穀米蓋造倉廩之用所改

倉廩

賜名鹽義倉事下議政大臣大學士九卿詳議大臣等議揚州府治爲安徽江蘇道里之中鄰省亦一水可通於此建倉實爲便利應令噶爾泰將此三十萬兩選交老成殷實之商四人辦理建倉務擇高燥寬閒之地或於城內或於城外分作幾處約費幾萬兩所餘銀兩就米多處照時價分路採買或儲米或儲穀均令噶爾泰與辦理之商斟酌定議儻因採買米多一時價昂卽停俟價平時再行購買倉儲米穀卽交選出之商人管理巡鹽御史不時稽查每年於青黃不接時照存七糶三例出陳

易新或於米貴時開倉平糶總至秋成糶補儻地方有賑濟之用各該府一面題請一面動支管理之商人每年將出易糶補動支之數呈報巡鹽御史核奏其出陳易新平糶平糶之內或有贏餘卽以增買米穀奉

旨依議此係商人急公銀兩卽於本地買儲米穀備用商人等自然盡心管理不致虧缺儻將來有不得已虧缺之處朕必察情寬宥欽此

雍正四年六月戶部議覆巡鹽御史噶爾泰據運使張坦麟詳請代奏原商黃光德等願輸銀四萬兩以供薪水坦麟不敢私爲已有請以充公又淮北商人程謙六等

呈兩淮捐輸淮北例出水腳請將出水腳銀一萬四千四百兩捐爲建倉之用應將眾商所捐銀兩并淮北水腳銀共五萬四千四百兩行令該御史收儲運庫照原估建倉銀數動支建造其餘賸銀並原捐銀三十萬盡數買儲米穀奉

旨允行其水腳銀內之四千四百兩以

賜張坦麟

雍正四年八月巡鹽御史鳴爾泰疏言揚州建倉積儲備賑部文有或儲米或儲穀行令酌議竊思儲米則所需廩座較少而南方卑溼不無紅朽之虞儲穀則所需廩

座較多而恃其房甲可以久藏是儲米不若儲穀今奉
文每年存七糶三出陳易新似不至於陳腐應行米穀
兼買俟每年糶糴之時察看宜米則盡數儲米宜穀則
盡數儲穀此內或有贏餘卽以增買米穀茲據商人黃
光德等請照江南復成倉式查有東關城內並廣儲門
外地基二所每厰一間可儲米穀二千八百石通共三
處建厰一百三十間可儲米穀三十六萬四千石其購
買基地建倉工料價值核估銀五萬二千六百九十六
兩有奇見於六月十七日興工臣卽會同運使張坦麟
親詣查看東關城內並廣儲門外兩處地勢高燥寬閒

均於河道相近易於盤運建倉實屬相宜選出老成殷
實商人黃光德汪勤裕馬裕汪晉德經理秋成時卽令
赴米多地方採買積儲部議應令該御史將眾商捐輸
薪水水腳等銀五萬兩交付商人黃光德等經理建造
照原估數目仍不敷銀二千六百九十六兩在於原捐
三十萬兩內動支補足餘賸銀兩俟秋成酌量採買
雍正五年七月鹽政噶爾泰疏言接准部文奉

旨於近竈地方建倉積穀今擬於泰州通州如皋鹽城海州板
浦建倉六處共一百六十七間可儲米穀三十萬六百
石所需工料銀六萬五百二十三兩有奇場地建倉非

揚城近處可比應每處各錢二商同爲料理於本年七月十一日開工其應儲米穀照鹽義倉版部議遵行至竈民居住遠近不一當酌量捐備腳價運送散給免令窮竈跋涉亦不累商

雍正十二年八月鹽政高斌於清查規費酌給養廉案內奏准兩淮三分司所屬各場有應存折價耗羨商規引費通共銀四萬一千八百一十餘兩請酌給分司以下各員養廉公費及書役飯食紙張銀二萬八千八百三十二兩餘銀一萬二千九百八十兩有奇留儲運庫除酌給試用人員薪水外其餘統作每年添補鹽義倉積

穀

雍正十三年兩江總督趙宏恩清查派累經運使尹會一
察出通分司所屬馬塘等場有陋規公蕩等租銀二百
餘兩詳准於石港場設倉積穀備賑

雍正十三年七月鹽政高斌奏請增倉分儲一摺言兩淮
場竈欽荷

皇仁於近竈之地建設鹽義倉經前鹽臣噶爾泰在於泰州通
州如皋海州鹽城板浦建倉六座交商採買備儲在案
伏查泰分司所轄十場止有泰州倉廩一座通分司所
轄十場止有通州如皋倉廩兩座各場地方遼闊有去

倉寫遠者一遇緩急動用旣費腳價更需時日至淮分
司所轄八場雖有海州板浦鹽城三倉但海州板浦俱
在淮北隔越黃河而淮南之廟灣新興伍祐劉莊白駒
等五場止有鹽城一倉距廟灣劉莊亦屬路遠臣細加
體察有泰分司駐劄之東臺場係泰屬十場適中之地
通分司駐劄之石港場係通屬十場適中之地均可建
倉分儲其廟灣場雖在新分之阜甯縣城外查城內亦
可建倉臣請於東臺石港二處各建倉一座每座分儲
穀一萬石阜甯縣建倉一座分儲穀五千石如此則濱
海各場可以就近接濟其分儲穀石查有通泰等倉從

前賑糶動用米穀見在買補卽於此內酌撥造冊報部
所需建倉工料銀兩請於裁存巡費陋規項下動支新
分三倉遇青黃不接應令各該分司就近督率場員監
糶其餘各倉臨時委員稽察再令儲攸關綦重揚州通
泰等倉向俱交商管理令鹽臣稽查凡鹽臣離任之際
應照常平等倉督撫交代之例將冊移交新任接管仍
於每年歲底開造四柱清冊送部揚州四倉令運司造
冊通泰等倉應令鹽務道查察造冊鹽務道管通泰等
倉於乾隆六年裁
撤鹽務道後歸併
運司鈐束經營奉

旨如所奏行

乾隆十一年八月鹽政吉慶奏言兩淮鹽義倉額儲穀三十二萬七千六百石因節年賑糶動撥以致缺額臣以積儲緊要遵

旨擇豐收價平之地採買一遇價昂卽行停止是以連商人應補氣頭折耗并出易及上冬今春廟灣等場賑糶共止缺穀三萬八千餘石見今連米作穀統計實儲穀二十八萬九千餘石本年僅有淮北三場被災所需賑穀無多而江蘇省民戶有二十餘州縣賑恤浩繁督撫二臣因公過場臣與面商僅可以鹽屬之積儲就近通融接濟使災黎得以早沾實惠惟是鹽義倉之設固爲竈計

而亦關於民食若使多儲於豐年自是有備而無患臣親見廩座堅固頗有敷餘似宜量爲增益以裕倉儲臣請增買穀十七萬二千四百石連原額共成五十萬石之數庶幾緩急有資民竈攸賴查買補鹽義倉穀石向動一半充公餘平并各場耗羨規費溢餘銀兩但前項銀兩多寡不定且有應買缺額穀石尙須動支今臣所請增儲穀數請先行借支正項俟續收餘平規費等銀陸續歸款報部仍悉照鹽義倉例每年於秋成之候飭商不拘本郡外省惟擇豐收價平之處乘時採買貴卽停止不致有妨市價九月奉

旨俞允因借動本年續收鹽課正項內採買揚州四倉增儲穀
十二萬石泰州倉增儲穀四萬石通州倉增儲穀八千
四百石鹽城倉增穀四千石

道光十五年海州分司童濂稟前奉憲札以江南頻年被
災飭令勸儲倉穀以備荒歉因思鹽務儲穀備荒專爲
竈戶而設商竈誼同一體竈戶曬埽之鹽專備商人收
買則竈戶歲遇歉收商人豈能視同隔膜卽遠方票販
攜貲而來獲利而返所買無非竈戶曬埽之鹽是票販
與竈戶亦不能不誼關休戚是以卑職遵奉憲札示諭
商販人等於交收鹽價之時每引各捐一分由局商收

齊彙交分司庫內存貯見已收銀三千六百四十一兩一錢六分查板浦鎮舊有鹽義倉向爲商人儲穀之地地基甚寬見在尙存正倉數間如先在捐項動撥修整施工尙易除慎選本境公正殷實董事經理並妥議收買章程外另行請示遵行

道光十七年海州分司童濂稟查淮北鹽義倉兩所一在州城之內海州見借儲穀卽當移催交還一在板浦鎮地面舊分五穀熟三廩五字居中穀左熟右年來三廩俱廢僅存基址查原建中廩寬大較左右兩廩儲穀爲多照見在捐款約計買數五字廩足數堆儲應先將五

字厥估計修復卽在捐款內動支其穀熟兩厥另俟捐
項充足之後次第重建以還舊規經鹽政陶澍批允

咸豐四年二月海州分司許敦詩詳板浦鹽義倉穀石自
咸豐三年春開動放之後僅存倉穀七十四石五升不
敷散放癸丑綱鹽課疲滯各商販捐款未全未及乘時
採買見當各貧竈待哺甚殷又未便籌款買穀以致散
放需時當卽遵照部價每穀一石折銀五錢按照見在
查報戶口將所需折穀銀兩發交各該場散放實放折
色庫平銀二千九百四十二兩一錢三分七釐五毫相
應將各場散放竈丁折色口糧具文轉報經運使郭沛

霖詳請鹽政怡良核銷

咸豐七年正月海州分司杜文瀾稟板中臨三場竈民素鮮蓋藏青黃不接之時必須另籌接濟當經勸諭各場商捐貲平糶兇據場員面稟各商願於鹽價內按引捐銀一分約計銀四千兩卽於板浦中正設厰平糶其極貧者無力買食另議卑職創捐銀五百兩勸諭三場及各渠販酌量補助就所捐銀數定糴粥之多寡分交各場商代爲煮粥分送所有柴薪桶價挑送人工均不必令場商賠貼經運司郭沛霖批據稟各場商捐貲平糶並另議捐辦擔粥各章程甚爲妥協仰卽趕緊分別妥

辦事竣據實報查

同治四年七月海州分司沈炳詳所屬三場地處海濱竈食習於雜糧前童分司修復義倉時卽有一半儲穀一半儲雜糧之議但所儲雜糧不能如穀稻之經久是以循照歷辦成案稟請買穀儲備今場境因夏秋陰雨過多鹽池大半被淹竈隸人等業已嗷嗷待哺見在已有請給口糧情形秋後卽須接濟自應因時變通就近採買雜糧將來放給按照穀數酌量加增竊竈得食更多係爲目前備荒起見理合上詳經運使李宗義批查鹽義倉歷來皆係買穀儲備向不採買雜糧以期經久前

據蘆前分司具稟雖有一半儲穀一半儲雜糧之議但
續後採買仍皆儲穀並未積過雜糧是不能經久之明
證也據詳因時變通就近採買雜糧加給窮竈等情究
竟該竈鹽池見在被淹情形輕重如何竈曬人等是否
亟須接濟應由該分司趕緊確查專案稟辦一面核計
需放雜糧若干亦止能就數採買濟用其餘仍應照案
趕買好穀上倉以資儲備而期經久

同治六年八月海州分司沈炳稟淮板浦鹽義倉上兩
綱商販捐存倉穀銀兩業經先後稟蒙批准採買雜糧
散濟貧竈口糧均各報銷在案茲查壬戌新綱見已開

辦所有應捐倉穀應卽照常帶收惟思救荒無善策與
其歸於官勢必假手於人不若歸於商猶得實惠於竈
卽如淮北鹽價向係呈繳卑庫再行給發嗣奉批由販
自付各商稱便卽其明證且垣商係屬業主平日全賴
曬丁力役以資收埽卽無撫恤亦必另行接濟斷不至
稍存膜視擬請自壬戌綱起將各商應捐倉穀每引一
分毋庸帶收如遇應行濟竈之時卽由商各歸各垣按
戶散給以昭核實至販捐每引一分并請俟捐有成數
發交各販或買好穀或買雜糧隨時由販自行採買上
倉存儲迨散放有期分別戶口歸商領給俾免浮冒經

鹽政曾國藩批據請將場商每引捐倉穀一分自壬戌
綱起免其帶收如遇荒歉由商自籌撫恤係爲便商杜
弊起見准其照辦其票販向捐之一分奏明有案仍應
照收俟收有成數發交殷實票販採買好穀儲倉備賑
謹按鹽義倉之設以積儲爲重其分併沿革之在於
案牘者有關經制則書之若其動支出納之數有司
隨時報查公牒亦繁更不悉錄

善堂

揚州育嬰堂舊在廣儲門外規模宏大咸豐癸丑以後
迭遭兵燹全圯同治八年就新城蘇唱街接嬰堂舊址

並購附近基地復建六十間九年運使方濬頤於堂之對門添建二十八間嗣嬰口增多推廣辦理設分堂增鄉局又以嬰孩寄養乳嫗之家名之曰外乳淮南運商每引捐錢二十六文通泰場商每引捐錢四十五文淮北垣商每引捐銀一釐票販每引捐銀四釐以充經費光緒九年湖南巡撫卞寶第奏明將商捐育嬰堂經費立爲專案不准挪解侵蝕以垂久遠此外尙有堂產田二千餘畝坐落江都儀徵兩縣境光緒十七年淮南總局開呈月支經費錢二千二百千文年終三千千文方濬頤撰育嬰堂記曰育嬰曷昉乎揚州在前明則號

爲育嬰社

國朝業鹺者西商員洪庥徽商吳自亮方如珽勸其事順治十二年建堂於西郭外歲需銀二千兩康熙四十年劉太守涵攝運司事月增五十金越明年又月增銀百兩雍正元年核減公費惟此款獨存乾隆八年朱運司續裨分西門雙橋便益門北來寺高橋廣儲門毘盧寺天甯寺共八處遴商人按月承辦二十年盧運司見曾置廣儲門外菜田爲育嬰之地三十年鹽政普福始仿吳中築屋四百間四十年鹽政伊齡阿增乳婦米銀五十六年鹽政全德將兩淮歸公田廬統命商司出內充

堂之用六十年鹽政蘇楞額運司曾煥各捐廉俸改建
乳房二百四十間此載在鹽法志者也自賓谷都轉改
建之後規模閎壯糜庫帑動至數萬迨道光庚寅辛卯
開鹽法一變運司俞德淵力杜冒濫而堂之用每年仍
須二萬數千有奇乳婦頭八人把持舞弊相沿已久且
遺留瞽目廢疾之女百數十人聚而不散咸豐三年堂
燬於賊嗣以各善堂田歸揚州守經理而乳婦頭猶率
殘廢強索口糧始補給腰牌數十名同治八年新建育
嬰堂於城內預將官房改爲收養殘廢之所而濬頤適
由廣東量移兩淮因收繳腰牌給貲遣散之乳婦頭則

革去之而其患始息於八年四月修造號房六十間九年四月又於堂之對門建房二十八間命汪知事應溥會同紳士經理後卜頌臣中丞告養歸里遂肩其事以嬰多堂不能容宜添外養之所又於北鄉黃珏橋立分局收養月必至堂視乳者勤情數年以來全活嬰覲無算視曩之散而難稽惠而不實者異矣顧田磽產瘠年歉卽形支絀因與濬頤籌商接濟之款白諸上官幸而集事往者淮商體大物博而不免於鋪張揚厲失其本真自不如今日歸之紳衿耆老樸誠簡易之爲得也槐子橋保嬰局在揚州郡城外北鄉同治十三年由通

泰場商每引捐錢八文以助經費

揚州立貞堂在新城左衛街道光二十年儀徵監生吳世璜家業鹽力行善舉憫婦女青年矢志孤苦無依勸建斯堂收養江都知縣羅煜題後好善者多所捐助更闢其地淮南商人稟請按引捐帶三釐運使但明倫詳請鹽政璧昌批准由運庫給發兵燹後屋宇多圯同治七年重修運使李元華勸諭場商按引捐釐建置號舍七十七間月給嫠婦鹽菜等費由紳士經理

揚州普濟堂在東關門外光緒十七年淮南總局開呈月支經費錢十千

邵伯鎮同善堂揚州知府尹會一建雍正十一年鹽政
高斌定於裁存火伏舟車費內歲給銀四百兩光緒十
七年淮南總局開呈每季支市平銀五百兩

揚州務本堂在北柳巷咸豐三年疊遭兵燹舊堂遺址
蕩然無存同治初揚州營參將朱元松倡捐興建堂中
善舉以施棺掩骼義塚爲最重其餘病者送診施藥饑
者施粥寒者施衣以及義學惜字次第舉行光緒十四
年通泰場商按引捐錢一文以助經費

揚州崇節堂在北河下收養青年嫠婦貞女並准隨帶
子女其經費除棲流所引捐項下移撥四文外通泰場

商又按引捐助四文始於光緒十四年

揚州棲流公所在崇德巷棲息流民流勾並施送醫藥
光緒九年起運商按引捐錢八文通泰場商按引捐錢
六文嗣在前款內撥出四文協濟崇節堂經費

揚城殘廢局光緒五年通泰場商按引捐錢四文以助
經費

揚州粥廠每年冬令在瓊花觀煮粥散放賑濟窮黎運
商每引捐錢十八文通泰場商每引捐錢十六文始於
同治十一年

儀徵公濟堂粥廠每年煮粥賑濟自仲冬起正月止場

運各商按引捐錢五文始於光緒二年

泰州清節堂嘉慶二十三年捐建咨部有案堂中收養節婦貞女定額三十三名額外挂號四十名報名挨補仍在各家居住每名每月給錢四百文俟補額內再行入堂候選縣丞周彬先捐錢一千千文光緒六年商人捐助經費

豐利場保嬰局在場之北街虹橋南首同治六年大使劉承廉勸設光緒八年大使高元錫率董倡捐集款助養嬰孩

豐利場同仁堂同治七年勸設辦理施棺掩埋各善舉

掘港場育嬰堂康熙三十三年勅建本場商竈捐置田畝洪成益歲捐經費光緒十七年通州分司開呈由場率商竈集資收養嬰孩按月發給乳工

石港場普濟堂在場南隅乾隆元年大使王之正移於市東土山之巔九年分司張廷璇大使胡作肅捐俸建屋二十六楹置田一百四十餘畝又市屋二十七間草房八間邑人張志尹張勁夫許士升等又施田十七畝瓦屋三間草屋一間歲入租銀一百三十餘兩月給孤貧老人口糧及藥榷之費按年報銷以爲常今分司亦捐廉飲助

石港場育嬰堂康熙三十八年舉人丁嘉惠貢生張之
煥及許汝琦等公建之煥復捐西門花家觀音堂田六
十畝以助乳工汝琦等各捐田產爲經費勒石爲記嗣
因歲入不敷乾隆二年運判顧茹申請於公蕩等項內
撥濟乳費銀六十三兩有奇四年運判張廷璇詳請於
廣裕倉公租內再撥八兩以充乳費八年廷璇又詳定
育嬰堂有樓一所房一間收租備用年久就傾董事丁
錦等捐貲改建亂後經費支絀見由通州分司按季在
淮南總局領銀一百四十兩

馬塘併場育嬰堂道光閒建光緒十六年分司徐紹垣

重修以原有田畝租息並殷實各戶助資收養嬰孩分司亦捐廉飲助

金沙場公善堂一所今存

金沙場難民棲息公所今存

呂四場同善堂光緒年建辦理育嬰撫恤殘廢收買字紙各善舉有鹽務助資

餘西場育嬰堂在場署東首五福橋光緒十三年建以各戶施助田蕩租息爲收養嬰孩經費

耕茶場有嬰堂道光二十四年監生蔡謙施田勘建存養嬰孩今存

耕茶場救嬰局道光二十一年監生徐榮達施田勸建
今存

耕茶場積備堂道光二十年監生徐登陽施田勸建以
每年租息備荒濟賑今存

耕茶場益善堂道光二十四年監生蔡謙施田勸建以
每年租息於隆冬賑粥今存

耕茶場同仁體仁兩堂嘉慶二十二年監生繆蒼等捐
資施送義棺道光三年又捐田歸堂兼給童生考試卷
燭今存

東臺保嬰堂康熙年徽西商人勸建光緒二十五年分

司鄭某改建稟定運庫每季貼給市平銀一百兩嗣又
停給同治二年在淮南總局善舉項下每季撥錢六十
千後改於運司衙門商捐善舉經費內按季照數撥給
此外場商按引捐錢四文由分司委員管理分設內外
堂收養遺嬰內堂常收養三四十名外堂一百一二十
名如經費短絀由分司捐廉彌補

伍祐場保嬰堂光緒九年設本場大使翟樂善倡首每
年捐廉二百千文各垣商按引捐錢十文綜計每歲可
抽六七百千文堂中收養額定內堂十口外堂二十口
自乳二十口俟經費充裕再行推廣

西壩育嬰堂光緒十七年七月兩江總督劉坤一江蘇巡撫剛毅以各處焚燬教堂每多藉口殘害嬰孩飭卽籌辦育嬰事宜於是海州分司徐紹垣酌議章程五條先籌款在西壩設立自乳嬰堂專濟有嬰孩無力撫養者每月給乳工錢八百文又飭三場大使在於板浦鎮推廣仿照西壩章程一律設局其款勸諭商販捐助板浦鎮育嬰堂光緒十七年設商販捐助經費

泰州因利局光緒年分司沈桂設立籌款一千串轆轤借給窮民小太營生整借零還不取利息局用一切亦由分司捐備

西壩順濟局光緒九年三月海州分司徐紹垣仿照揚州因利局借錢章程籌款一千千文初設此局其章程不取分文利息借一千文者每日還本十文五日一送百口收清借錢之數自六百文起至三千文止所有司事薪水差勇飯食另行籌募開支

板浦鎮順濟局光緒九年七月海州分司徐紹垣飭板中臨三場大使仿西壩章程設立由官商倡捐又太平垣商每引捐銀一釐以資局用

桃源邳州厚生利濟二局光緒十六年十一月漕河總督松椿飭海州分司徐紹垣設立借錢章程與西壩同

由岸商鄧應舉總司其事並籌款以期推廣

海州新安鎮順濟局光緒十七年三月分司徐紹垣籌款飭董開辦

邵伯壽雲莊順濟局光緒十七年三月海州分司徐紹垣籌款諭董開辦

揚州課桑局同治十一年運司方濬頤創設濬頤爲之記又作湖上桑田記曰攷之平山堂圖志邗上農桑在迎恩橋西岸有浴蠶房有分箔房有綠桑亭迤西之大起樓繞屋桑陰扶疏可愛樓之右則爲染色房房之前則爲練池池之西則爲練絲房度橋而西又爲螺祖祠

經絲房聽機樓紡絲房東西織房成衣房獻功樓披斯
圖也想見伊昔盛時太平豐樂景象雖

鑾輅游觀之所尙復

厘念民生設此以爲勸猗歟休哉濬頤承乏兩淮值兵燹之餘
湖上園亭蕩爲榛莽同治辛未壬申閒旣修復平山谷
林二堂復念邗上農桑之義欲倣其情厲其勤爲課桑
之舉於湖東江氏淨香園故陟鳩工築室一區顏曰課
桑局刊碑記之檄屬吏買桑於吳興分給農民領種十
萬餘株而局之前後亦種數千株以爲官桑飼蠶繅絲
需其直備善舉之用嗣以局費借飲於市肆不可以竭

商賈之力因議停捐向者局主於官今則歸紳主之以
官桑太少因與卞頌臣中丞鄭芝巖太史劉綬卿舍人
謀擇官地闢桑田乃久之甘泉令以冊籍無稽告嗣於
局東數武得地四十餘畝云爲畢園故陞今歸邵氏局
之地爲淨香園乃奉宸院卿江春別業載在平山堂圖
志志中無畢園名是耶非耶不可得而知已因以錢三
百緡購其地爲桑田郡有尹氏某以種桑爲業者司局
務云湖桑近日江州皆有之不必遠求也因屬其市桑
萬株蒔之天膏濃霈彌望沃若三五年後璘藉燦然女
紅以興婦職無忝而所謂浴蠶也分箔也染也練也經

也機而織也紡而成衣也獻功也皆於田乎肇端吾意
綠桑亭嫗祖祠固不得擅美於前而揚之民崇木抑木
去靡麗返敦龐蒸爲善俗又何苟田之足云

章門育嬰局在江西省城所需經費向藉勸捐濟用運
商業鹺江右每票捐銀五兩光緒八年秋議定自庚辰
春綱爲始捐至甲申春綱爲止統計九綱共捐銀五千
一百兩本應停捐嗣經江西巡撫傳諭育嬰經費支絀
若失鹽捐更難爲繼仍宜接續捐助又自甲申秋綱起
至戊子秋綱止此九綱內仍照前章每票捐銀五兩又
捐銀五千一百兩通計二次捐銀一萬二百兩

湖北德安寶善堂由分銷局每年助經費銀一百兩
武穴樂善堂各商捐設有年光緒三年由分銷局每年
助經費漢平銀一百兩

湖南立貞堂同治四年興復督銷局詳請恤發經費鹽
政曾國藩批准每年籌支錢二千八百千文

湖南接嬰堂同治四年興復督銷局據紳士詳請經費
鹽政曾國藩批准每年籌支錢一千六百千文

湖南普濟堂光緒元年鹽政劉坤一允長沙府知府王
述恩請由淮商公局每年籌捐制錢一千六百千文以
充經費

湖南益陽縣育嬰堂光緒十年湖南督銷局稟准於鹽釐項下每包捐銀一分以充經費

湖南公惠局光緒六年設在省城萬福禪林仿揚州借錢局章程每年由督銷局籌錢二百千助經費

湖南養濟院 保節堂 恤疫局 官醫局

恤無告堂均由督銷局按年撥助經費

湖南育嬰堂光緒十一年鹽政曾國荃札行湖岸督銷局按年撥助經費

湖南鄉團收嬰總局光緒十一年勅設鹽政曾國荃飭每年籌銀一百五十兩發給領用

救生局

江甯府救生局同治五年江甯食岸督銷道員廳際雲以鹽商罰款二百二十兩助救生公用

瓜洲口救生局在淮南總局每月支經費十千文

焦山救生局在淮南總局按季領經費六百千文

京口救生會光緒五年通泰場商每引捐錢四文助經費

揚州壁虎橋救生船光緒十五年通泰場商按引捐錢一文又各屯船每引捐錢一文共捐錢二文以助經費自七月朔起分別按引常年捐繳

高郵鹽社湖紅船在淮南總局每季支經費錢一百千文

安徽蓮花洲救生船五光緒十七年起運商按引捐錢八文以助經費

洪澤湖救生紅船四光緒八年淮揚道以洪湖風濤險惡鹽船往來俱有戒心議造救生船飭海州分司張元愷籌助經費元愷轉諭湖票兩販每包捐錢一文湖票各半每綱計捐錢一千一百八十餘千稟請鹽政劉坤一批允按月解交淮揚道衙門轉發嗣因不敷開支每月又加捐錢三十千

湖口掣驗卡紅船一光緒十一年設船價共需庫平銀一百九十八兩零就在提私充公銀兩項下支放并發卡勇六名以資駕運

武穴分銷局紅船二同治八年設所雇舵工水手等工食由局項下開支

岳州救生局紅船十三光緒九年鹽政札行湖南督銷局轉飭淮商將原捐每票八串專歸救生局經費一項永遠遵行

漢口鎮碼頭爲鹽倉起鹽要道光緒八年興修由鄂岸督銷局捐助錢七百千在局用冊內開支

武穴礮船碼頭光緒二年十二月修築計地陞價值各項工料錢一百九十五千餘文在武穴局用項下開支武穴下塘口游繩光緒二年重設計長四百餘丈於大水時安設逐年更換每年需錢五六十千在局用項下開支

義渡

江都縣霍家橋義渡經費按季六十千文在淮南總局發給

沿江義渡紅船光緒八年設由江甯至儀徵沿江一帶南岸石埭橋與北岸划子口各設渡船二另設上下巡

察紅船一泰興縣境北岸之口岸鎮天星橋南岸之三
茅庵鈔票港姚家橋等處設立義渡七另設救生船一
運商按引捐錢十文場商每引捐錢八文由董具領分
撥濟用

金陵義渡光緒十七年江甯府李廷簫以金陵草鞋夾
上游之下關下游之巴斗山舠設義渡經費不敷詳准
鄂湘西皖運商按引捐助錢四文

大港三江營義渡光緒六年起由淮南總局按月籌給
經費錢二十千文

揚州徐凝門官河尹公渡渡船一 馬頭渡船一

謹按尹公渡舊有二船今廢其一

揚州缺口門官河上義渡渡船二

北橋義渡渡船二

六閘渡船三光緒七年起各屯船按引捐錢二文以充經費

謹按六閘渡船舊止一船今添二船

徐凝門外二嚴庵萬松義渡今未設船

鈔關門外趙公義渡見有渡船三上水一下水一

江都金灣河渡船一

江都南善應鄉儀河口渡船一

江都洋子橋渡船二

江都東石人頭渡船二

揚州便益門外五臺山義渡船舊有一船今浮橋

儀徵帶子溝渡船一

儀徵樸樹灣渡船一

謹按以上渡船從前皆有商捐經費

橋梁街道

揚州古雷塘當郡城西北孔道乾隆三年淮商汪應庚
建石橋以便行旅

揚州東關大街乾隆中淮商羅綺重甃并築城外石馬

頭

揚州新城街道淮商鮑志道重修自康山西至鈔關北抵小東門盡發以石

儀徵龍門橋康熙五十四年圯於潮淮商汪文學鳩眾重修

掘港場街道自雲浦橋抵包垣又自西方寺街至鹽課司前凡數里乾隆五十七年西商孫裕鳩眾重修又市街三條乾隆六十年徽商吳永瑞鳩眾捐貲發以石

石港場市街徽商吳永瑞修悉發以石市中太平米市拱聖三橋皆場人張嘉善建諸生陳邦棟捐千金重建

東運河上石橋

卽舊志孔明橋

乾隆五十七年場人顧百朝重

建西門外大木橋嘉慶初場人張遇文改建北門大木

橋費以石需費數千金家財不足稱貸以竣工通判秦

永清名之曰廣濟

馬塘場舊有石橋場人羅世德建

耕茶場西石橋場人繆國賢重建又龍津橋乾隆八年

竈戶周昇高等建

富安場大石橋徽商黃修忠捐千金建盈甯橋在場南

嘉慶間商人建

安豐場廣容石橋場人王文貴父子建布政使林茂爲

之記王嘉令甃通場石街七里

梁埰場望海橋場人周樽建周自立兼修望海通濟二橋仲禧重修石橋周三孝重建袁公橋又場北轉水石橋爲通行要道建自前明嘉慶間場紳程兆揚捐修並修本場泥路甃以石行者便之

東臺場木橋十二安豐呂氏建又利濟橋嘉慶六年東臺竈衿常國均朱繡丁士英捐貲公建

丁谿場慶豐橋乾隆間場人楊大成募修五十六年監生馮印修本場河東大街場人劉實募修舊場河西大街嘉慶二年場人馮廷芳修舊場十字街

小海場永安橋場人邵予正捐四百金興建乾隆三年
場人宗淑良等募修輒街二十九年場商朱鳳儀吳鏡
裴共捐二千金甃以石西橋場人康錫士妻李氏重建
草堰場北橋場人周瑄建又石橋袁文耀建

伍祐場河通濟橋圯乾隆三十二年場商程家潤改建
甃以石工費二千三百餘金里人爲立碑記

新興場永興橋監生沈任重建

廟灣場會龍橋場人周銘重修

義冢

揚州義冢凡十九郡城東郊十處一在三茅庵一在菩

提庵一在長生寺一在玉掌宮南一在玉掌宮西北一
在玉掌宮北一在大王廟南一在凹子街南一在廣佛
寺西南北郊九處一在小虹橋一在葉公橋一在宵市
橋一在迎恩橋一在小茅山一在鐵佛寺一在建隆寺
一在梅花嶺一在育嬰堂

豐利場義冢十處

石港場義冢五處

馬塘併場義冢二處

金沙場西亭併場義冢三十處

餘西場義冢十一處

泰州義冢在分司署後由分司捐廉培修

長沙省城外郭義山光緒六年鹽政吳元炳飭湘岸票商每包捐錢三文甲戌秋綱起至乙亥春綱止共捐錢三千數百串以助經費

湖南義山各善舉光緒十年職紳黃慶光總其事需款五萬餘兩皆由湘岸票商捐助

兩淮鹽法志卷一百五十二

兩淮鹽法志

卷一百五十二

雜紀門 善舉

三